



Broj predmeta: UP-I-KSI-09-03/25

Datum: 11.09.2025. godine

Na osnovu člana 25. stav (1) tačka a) i b), člana 32. Zakona o sprečavanju sukoba interesa u institucijama Brčko distrikta Bosne i Hercegovine („Službeni glasnik Brčko distrikta Bosne i Hercegovine“, broj: 04/21) i člana 25. Poslovnika o radu Komisije za odlučivanje o sukobu interesa („Službeni glasnik Brčko distrikta Bosne i Hercegovine“, broj: 19/21), Komisija za odlučivanje o sukobu interesa, postupajući po službenoj dužnosti u predmetu utvrđivanja povrede odredaba Zakona o sprečavanju sukoba interesa u institucijama Brčko distrikta Bosne i Hercegovine od strane N.S., ul. [REDACTED] br. [REDACTED], Brčko, člana [REDACTED] Brčko distrikta Bosne i Hercegovine nosioca javne funkcije, na 129. sjednici, održanoj dana 11.09.2025. godine, donosi

### RJEŠENJE

1. **UTVRĐUJE SE** da je N.S., član [REDACTED] Brčko distrikta Bosne i Hercegovine kao nosilac javne funkcije, postupio protivno odredbama člana 19. stav (1) Zakona o sprečavanju sukoba interesa u institucijama Brčko distrikta Bosne i Hercegovine na način da u roku od 30 dana od dana stupanja na javnu funkciju, Komisiji za odlučivanje o sukobu interesa nije podnio izvještaj o imovinskom stanju nosioca javne funkcije.
2. Za učinjeno kršenje odredaba Zakona o sprečavanju sukoba interesa u institucijama Brčko distrikta Bosne i Hercegovine, shodno članu 39. Zakona o sprečavanju sukoba interesa u institucijama Brčko distrikta Bosne i Hercegovine N.S. **izriče se novčana sankcija u iznosu od 1.000,00 KM**, koju je imenovani dužan uplatiti na račun i u korist Budžeta Brčko distrikta Bosne i Hercegovine, račun primaoca 552-000-18267624-57, vrsta prihoda 723113-novčane kazne i troškovi postupka, budžetska organizacija **3301001**, u roku od 15 dana od dana dostave rješenja, pod prijetnjom prinudnog izvršenja, te dostaviti dokaz o uplati novčane kazne u prostorije Komisije za odlučivanje o sukobu interesa.

### Obrazloženje

N.S., obnaša javnu funkciju člana [REDACTED] Brčko distrikta Bosne i Hercegovine na osnovu Odluke o imenovanju jednog člana [REDACTED] Brčko distrikta Bosne i Hercegovine, broj: [REDACTED] od 26.03.2025, te je shodno članu 2. stav (1) tačka b) i tačka c) Zakona o sprečavanju sukoba interesa u institucijama Brčko distrikta Bosne i Hercegovine nosilac javne funkcije i upisan je u Registar javnih funkcija i nosilaca javnih funkcija.

Shodno Zakonu „javna funkcija“ je funkcija izabranog ili imenovanog lica u organima i institucijama Distrikta, u pravnim licima koje osniva Distrikt kao i u pravnim licima kojima je povjereno vršenje javnog ovlaštenja i lica koje je imenovano, odnosno na čiji izbor ili imenovanje saglasnost daje Skupština Brčko distrikta Bosne i Hercegovine, odnosno Vlada Brčko distrikta Bosne i Hercegovine, ukoliko drugim zakonom nije drugačije propisano, a „nosilac javne funkcije“ je izabrano ili imenovano lice u organima i institucijama Distrikta, u pravnim licima koje osniva Distrikt kao i u pravnim licima kojima je povjereno vršenje javnog ovlaštenja i lica koje je imenovano, odnosno na čiji izbor ili imenovanje saglasnost daje Skupština, odnosno Vlada, ukoliko drugim zakonom nije drugačije propisano.

Članom 22. Poslovnika o radu Komisije za odlučivanje o sukobu interesa propisano je da je nosilac javne funkcije stranka u postupku.

Prilikom uvida u Registar javnih funkcija Komisije za odlučivanje o sukobu interesa kao i dostavljenih podataka od strane [REDACTED] Brčko distrikta Bosne i Hercegovine uočeno je da N.S., javnu funkciju člana [REDACTED] Brčko distrikta Bosne i Hercegovine, obavlja na osnovu Odluke o imenovanju jednog člana [REDACTED] Brčko distrikta Bosne i Hercegovine, broj: [REDACTED] od 26.03.2025. godine, u četverogodišnjem mandatu, u periodu od 26.03.2025. do 26.03.2029. godine, te da Komisiji za odlučivanje o sukobu interesa nije dostavio u zakonskom roku od 30 dana od dana stupanja na javnu funkciju Izvještaj o imovinskom stanju na Obrascu o imovinskom stanju nosioca javne funkcije, bračnog i vanbračnog druga, djece i drugih članova domaćinstva kao i lica prema kojima nosilac javne funkcije ima zakonsku obavezu izdržavanja.

Shodno navedenom, Komisija za odlučivanje o sukobu interesa je dana 07.07.2025. godine, po službenoj dužnosti, zaključkom broj: UP-I-KSI-09-03/25 pokrenula postupak protiv nosioca javne funkcije, N.S., ul. [REDACTED] br. [REDACTED], Brčko, člana [REDACTED] Brčko distrikta Bosne i Hercegovine, radi sumnje da nije dostavio Komisiji za odlučivanje o sukobu interesa Izvještaj o imovinskom stanju na Obrascu o imovinskom stanju nosioca javne funkcije, bračnog i vanbračnog druga, djece i drugih članova domaćinstva kao i lica prema kojima nosilac javne funkcije ima zakonsku obavezu izdržavanja, u roku od 30 dana od dana stupanja na javnu funkciju, čime je postupio protivno odredbama člana 19. stav (1) Zakona o sprečavanju sukoba interesa u institucijama Brčko distrikta Bosne i Hercegovine.

Nosilac javne funkcije je istim Zaključkom pozvan da Komisiji za odlučivanje o sukobu interesa dostavi izjašnjenje u roku od 15 dana od dana prijema zaključka.

Nakon prijema Zaključka o pokretanju postupka broj: UP-I-KSI-09-03/25 od 07.07.2025. godine, zaprimljenog dana 21.07.2025. godine, N.S. iz Brčkog, nosilac javne funkcije, član [REDACTED] Brčko distrikta Bosne i Hercegovine, dana 06.08.2025. godine dostavio je Komisiji Izjašnjenje u kojem je naveo da nije bio upoznat da se članovi [REDACTED] Brčko distrikta Bosne i Hercegovine smatraju nosiocima javne funkcije u smislu odredaba Zakona o sprečavanju sukoba interesa u institucijama Brčko distrikta Bosne i Hercegovine, te da ga niko o obavezi podnošenja izvještaja od nadležnih službi Skupštine Brčko distrikta Bosne i Hercegovine i [REDACTED] Brčko distrikta Bosne i Hercegovine nije obavijestio. Takođe navodi da je uredno popunjen Aneks II dostavio Komisiji 06.08.2025. godine, i da propust nije bio namjeran, već isključivo nesporazum i neinformisanost u samoj proceduri, te da Komisija za odlučivanje o sukobu interesa uzme u obzir da je propust bio samo nehatna greška koju je u međuvremenu otklonio dostavljanjem predmetnog izvještaja, te da mu se izrekne sankcija u

vidu opomene budući da se radi o lakom i nesvjesnom obliku kršenja odredbi ovog zakona bez nastupanja posebne posljedice.

Dana 18.08.2025. godine, nosilac javne funkcije obavijestio je Komisiju za odlučivanje o sukobu interesa da je podnio ostavku Komisiji za izbor i imenovanje i mandatsko-imunitetskoj komisiji Skupštine Brčko distrikta Bosne i Hercegovine, za [REDACTED] Brčko distrikta Bosne i Hercegovine, koje predstavlja javnu funkciju obzirom da je imenovan od strane Skupštine Brčko distrikta Bosne i Hercegovine.

Član 19. stav (1) Zakona o sprečavanju sukoba interesa u institucijama Brčko distrikta BiH, propisuje da je nosilac javne funkcije dužan u roku od 30 (trideset) dana od dana stupanja na javnu funkciju, podnijeti Komisiji Izvještaj o imovini, za sebe i bračnog i vanbračnog druga, djecu, druge članove porodičnog domaćinstva kao i lica prema kojim nosilac javne funkcije ima zakonsku obavezu izdržavanja, prema stanju na dan kada je izabran, odnosno imenovan.

Primjenom navedene zakonske odredbe na utvrđeno činjenično stanje, ocijenjeno je da u konkretnom slučaju postoji povreda Zakona, s obzirom na to da N.S., kao nosilac javne funkcije u roku od 30 dana od dana stupanja na javnu funkciju nije dostavio Komisiji za odlučivanje o sukobu interesa Izvještaj o imovinskom stanju na Obrascu o imovinskom stanju nosioca javne funkcije, bračnog i vanbračnog druga, djece i drugih članova domaćinstva kao i lica prema kojima nosilac javne funkcije ima zakonsku obavezu izdržavanja, a što je bio obavezan, čime je postupio protivno gore navedenoj zakonskoj odredbi.

Član 38. Zakona propisuje kazne nosiocu javne funkcije koji postupi suprotno članu 19. Zakona o sprečavanju sukoba interesa u institucijama Brčko distrikta Bosne i Hercegovine, dok su članom 39. Zakona propisane novčane kazne nosiocu javne funkcije koji postupi suprotno odredbama člana 19. Zakona.

Komisija je, shodno članu 39. Zakona o sprečavanju sukoba interesa u institucijama Brčko distrikta Bosne i Hercegovine, prilikom odlučivanja o vrsti sankcije koju treba izreći u konkretnom slučaju u obzir uzela sve okolnosti kako bi izrečena sankcija odgovarala učinjenoj povredi Zakona.

Komisija je cijenila činjenicu da je N.S., nosilac javne funkcije propustio da podnese Komisiji Izvještaj o imovinskom stanju u roku od 30 dana od dana imenovanja na javnu funkciju, te činjenicu da je N.S. prvi put imenovan za nosioca javne funkcije kao član [REDACTED] Brčko distrikta Bosne i Hercegovine ali i činjenicu da je Zakon o sprečavanju sukoba interesa u institucijama Brčko distrikta Bosne i Hercegovine stupio na snagu 10.04.2021. godine, te da od juna 2021. godine radi Komisija za odlučivanje o sukobu interesa i da je morao biti upoznat sa zakonskim obavezama koje kao nosilac javne funkcije treba da izvrši, pa je cijeneći ponašanje imenovanog prema povredi odredaba Zakona kao i opredjeljenost imenovanog da postupi u skladu sa Zakonom, te otkloni razloge koje su je doveli do kršenja Zakona. Komisija je izrekla minimalnu novčanu kaznu koju nosilac javne funkcije treba platiti kako je to navedeno u izreci rješenja i da ista u potpunosti odgovara težini i posljedicama povrede Zakona.

Komisija je, cijeneći sve dokaze pojedinačno i u međusobnoj vezi, shodno članovima 4., 25. i 39. Zakona, donijela rješenje kao u dispozitivu.

Odluka Komisije bit će objavljena na službenoj Internet stranici Komisije.

**POUKA O PRAVNOM LIJEKU:**

Shodno članu 37. stav (1) Zakona, ovo rješenje je konačno u upravnom postupku i protiv istog nije dopuštena žalba, ali se može pokrenuti upravni spor u roku od 30 dana od dana dostavljanja rješenja, tužbom pred Osnovnim sudom u Brčko distriktu BiH.

Predsjednik

Komisije za odlučivanje o sukobu interesa

---

Admira Mujić, dipl. pravnik

**Dostaviti:**

- N. S., ul. [REDACTED] br. [REDACTED], Brčko,
- Internet stranica Komisije,
- Evidencija,
- Arhiva.